

بيعلی أرضك؟؟

جه وقالی بیعلی أرضك

وإرتاح یا خویا من همّها!!

قلت تقصد زرعها؟

قالی أرضك!!

یعنی تقصد نخلها؟

ولاً سَنَابِلِ قمحها؟

قالی أقصد کُلّها...

یعنی طینها ورملها!!

....

ردیت علیه من غیر ما افکر

لو ده قصدك لیّه شرط!!

لو قدرت تحقّقه تبقی دفعت مَهْرَهَا

فرح وقالی قوللی شرطك

....

الحساب بينى وبينك
بالعدد مش بالمقاس!!
عن كل حَبَّاية رمل تعدها
من طينها وكمان رملها
والسعر أنت تحدده
بأى عُملة تحبها
من غير مُغالطه فى الحسابات

....

إبدأ وعد ولما تخلص
مجموعها لازم تضربه
فى سنين تاريخها عمرها
وده شرطى وإبقى قابلنى
لما تجهز مهرها!!

.....